

弘

簡

錄

弘簡錄卷一百二十七

明刑部員外郎仁和弘齋邵經邦學

皇清翰林院侍講學士四世孫遠平校閱

侍從 宋四之四

孫奭 子璩

邢昺

崔熙正

馮元

郭禎

趙師民

聶冠卿

錢象先

張揆

楊安國

父光輔

杜鎬

孫杞

丁度

燕肅

子度孫瑛

劉夔

馬亮

子仲甫

洪湛

孫奭字宗古博平人徙須城幼與諸生師里中王徹徹死奭爲

解析微指諸生驚服於是門人數百相率從之以九經及第爲

莒縣簿遷大理評事國子直講太宗臨幸召講書至事不師古

以克永世匪說攸聞喟然歎曰此至言也賜以五品服真宗時

除諸王府侍讀轉對上十事判太常禮院司農寺累遷工部郎中龍圖閣待制與以經術進用守道自重卽有所言未嘗阿附取悅大中祥符初得天書以問與對曰臣愚所聞天何言哉豈有書也將祀汾陰夷陳十不可其一先王卜征五年歲習其祥祥習則行不習則增修德而改卜陛下始舉東封更議西幸殆非卜征五年慎重之義其二昔漢武先封中嶽祠汾陰始巡幸郡縣有事泰山今陛下旣已登封不必復幸汾陰其三漢承秦故惟立五時以祀天而后土無祀故祠汾陰自元成後遂徙汾陰后土祠於北郊今已建北郊乃捨之而遠祀汾陰非禮也其四西漢都雍去汾陰至近今不宜經越險阻遠違京師其五唐王業起自河東故明皇開臨幸之因祠后土聖朝之典事與唐異其六周宣遇災而懼萬世稱聖比年水旱相繼不宜下狗彘

同建勞民。應其後四不可。大要言陛下民神之主。先成民而致力於神。今震雷在冬。爲異尤甚。此天意丁寧以戒陛下。乃欲勞民事神。神其享之乎。帝遣皇甫繼明就問。又上疏言。昔陳勝起於徭戍。黃巢出於凶饑。唐高祖因煬帝漫遊而興。耶律德光以少帝惑小人而入。是以先帝嘗議封禪。實畏天災。尋詔停寢。今姦臣乃贊陛下以繼成先志。不思先帝嘗欲北平幽朔。西取繼遷。大勳未集。此之不圖。而反撰造祥瑞。假託鬼神。忘祖宗艱難之業。徇姦邪苟且之謀。臣所以長歎而痛哭也。會天下郡縣數有災變。又言古者五歲巡守。有國之事。非必有紫氣黃雲。然後登封嘉禾異草。然後省方也。今野鵬山鹿。郡國交奏。秋旱冬雷。羣臣率賀。退而腹非竊笑者。比比皆是。孰謂上天爲可罔乎。六年上將祀太清宮。輿又疏言。陛下每事慕效。唐明皇豈以爲令

德之主耶明皇禍敗之迹有足爲深戒者非獨臣能知之近臣皆知之而不言者此懷姦以事陛下也臣願陛下早自覺寤把損虛華斥遠邪佞不襲危亂之迹無爲不及之悔則天下幸甚帝以爲泰山汾陰之祀非始於明皇秦最無道而官名詔令郡縣至今不改開元禮今見循用不可因天寶禍亂舉以爲非作解疑論以示羣臣然知與朴忠容之弗斥久之以父老請歸不許出知密州居二年入爲左諫議大夫糾察在京刑獄又請罷天慶天祺天貺先天降聖諸節并天下齋醮張燕浮費不報復知河陽求解官就養遷給事中徙兗州天禧中又疏朱能姦僞人妄言祥瑞昔漢文成將軍僞爲帛書天子識其手迹坐誅本朝侯莫陳利用姦謀敗露旋踵亦論死明皇得王鉷田同秀等所爲靈寶符上清護國經寶券顧不能顯戮自謂德實動天

神必福我一旦變起老君寧肯禦兵寶符安能排難耶今朱能
所爲或類於此未幾能果敗又請減修寺度僧帝雖未用其言
嘗令向敏中諭令陳時政得失與以納諫恕直輕徭薄歛四事
爲言頗施行之仁宗卽位宰相請擇名儒以經術侍講讀召爲
翰林侍講學士同修眞宗實錄父憂起復兼判太常寺及禮院
三遷兵部侍郎龍圖閣學士每講論至前世亂君亡國必反覆
規諷上意或不在書則拱默以俟帝爲竦然改聽嘗書無逸圖
上之帝命張於講讀閣勅帝每日御殿以覽萬機帝與太后愛
重之每進見必加禮三請致仕詔敦諭之與以年踰七十固請
渙下帝爲惻然詔與馮元講老子各賜帛優拜工部尚書復知
兗州留侍宴太清樓近臣皆預帝作飛白大字賜二府而小字
賜諸學士與與晁迥兼賜大小字詔羣臣卽席賦詩太后出

禁中珍膳初酒入謝又命講老子賜襲衣金帶銀鞍勒馬行日
賜宴瑞望園御製詩近臣皆賦以恭謝恩貺改禮部尚書太子
少傅致仕卒帝聞嗟歎久之罷朝贈左僕射諡曰宣爽性方重
事親篤孝父亡舐其面以代頻嘗掇五經切於治道者爲經典
餘言五十卷又撰崇祀錄樂記圖五經節解五服制度奉詔校
定諸經正義莊子爾雅釋文考正尚書論語孝經爾雅謬誤及
音義初園丘無外墻五郊從祀不設席尊不施幕七廟時饗飲
福用一尊不設三登升歌不以雍徹冬至祀昊天上帝外級止
十七位不以星辰從饗先農在祈穀之前上丁釋奠無三獻宗
廟不備二舞諸臣當謚者或既葬乃請輿皆援古奏正咸著於
禮又請冬至罷祀五帝大雩設五帝罷昊天上帝事下有司議
不合而止 子瑜字叔禮以廢爲將作監簿賈昌期薦轉崇文

檢討同知禮院開封判官使契丹適西方捷書至館伴要賀不肯行還加秘閣校理兩浙運使入辭仁宗訪其家世稱與大儒久以道輔朕因賜金紫先是郡縣倉庾斗斛大小爲姦瑜奏均其制黜吏之亡狀者民大喜徙知蔡州毀吳元濟像以事裴度大水緣城隙入使囊沙數千捍其衝城得弗壞更相充濰單四州累官工部侍郎卒年七十九爲人資性整敏齊家以嚴稱善與人交一經受知終身不易所薦士有過或使自言始朝廷錄與諸孫瑜不先已子以兄之孤先上時人多之

冊曰古稱直道與也庶幾全節完名舉世所希紛紛相列何足望之

邢昺字叔明曹州濟陰人舉九經廷試日太宗召升殿講師比二卦又問以羣經發題嘉其精博及第授大理評事知泰州鹽

城監監處楚泰閒泰僻而楚要鹽食爲急曷請改隸楚州從之
召爲國子監丞專講學之任遷尚書博士出知儀州代還賜緋
選爲諸王府侍講雍熙中遷水部員外郎賜金紫真宗遷司勳
郎中國子祭酒會置翰林侍講學士以曷爲之預校定九經義
疏成加階勳錫宴崇政殿賜衣帶器幣遷工部侍郎上幸國子
監閱庫書曷奏經傳正義板本大備士庶家皆藏有之斯乃儒
者逢辰之幸上喜曰國家雖尚儒術非四方無事何以及此上
方興起道術令舉經術該博德行端良者以廣學員又以曷官
府舊僚召賜白金且詔其妻至宮庭賜冠帔曷自陳年老願給
假一年歸視田里俟明年郊祀還朝上命坐慰勞許權本州曷
又言楊礪夏侯嶠同爲府僚沒皆贈尚書上知其志意語宰相
卽超拜爲工部尚書知曹州入辭特開龍圖閣賜襲衣金帶召

近臣宴崇和殿御製詩賜之曷視壁間尚書禮記圖指中庸凡
爲天下國家有九經陳其大義上嘉納之又令近臣祖送於宜
春苑東封表請車駕經由本州令濟陰令王範部送父老諸闕
優詔答之車駕進發命判留司御史臺俄進禮部尚書上勤政
憫農每雨雪不時憂形於色委曲訪之曷具田家陰晴豐凶狀
候老農相傳者爲對又言小民四患水旱疫痢畜災歲必有一
但或輕或重耳四事之害旱災爲甚蓋田無畋會所損必多上
多採納有疾詔太醫診視特恩臨問賜名藥白金器幣卒年七
十九贈左僕射有所撰禮選二十卷太宗作贊賜之至文王世
子篇因問衛紹欽曷爲諸王講說會及此乎紹欽曰諸王常時
訪問經義曷毋至發明君臣父子之道必重複陳之上益喜在
東宮及內庭侍上講孝經禮記論語書易詩春秋左氏傳據疏

敷行之外多引時事爲喻。浚被嘉獎，真宗嘗問文王以愛勤損壽。武王以安樂延年，曷對以本經旨意？必不然。且夏禹焦勞而享國，若文王不自暇逸，縱無感應，豈至虧損壽命耶？初，王欽若以知貢舉受賂有狀，詔曷等覆推曷力辯之。故欽若浚以爲德，曷厚被寵顧，與有力焉。兄素舉進士，得贈大理評事，二子俱被錄用。仲寶至三司判官、祠部郎中，若思駕部郎中。

崔熙正，封丘人，與弟偓佺並登進士。明經術，熙正雅熙中爲高密尉，秩滿孔維薦之。改國學直講，遷殿中丞。太宗召見，說莊子一篇，賜錢五萬，判監。李至上言先校定諸經音疏，其閒文字紕繆尚多，浚慮未副仁君好古誨人之意，蓋前所遣官多專經之士，或通春秋者未習禮記，習周易者不通尚書，至於旁引經史，皆非素所傳習，以是未得周詳。伏見熙正偓佺苦心彊學，博貫

九經問義質疑有所依據。望令重加刊正。冀除舛謬。從之。咸平
初。至方叅政。真宗訪達經義者。復以兄弟爲言。上曰。朕官中無
事。樂聞講誦。翼日召於苑中。說尚書大禹謨。賜以牙緋。自是日
令赴御書院待對。說尚書至十卷。自陳年老步趨艱蹇。表求致
仕。上命坐。問恤賜以器幣。俚淳化中。歷福州。連江尉。判國子
監。除爲直講。引對使坐。咸平二年。上幸國學。召說尚書。賜緋。後
令講道經。日於崇文院候對。終篇。賜以白金。綰綵。兄弟皆七十
九而卒。嘗撰帝王手鑑十卷。并注曹唐大遊仙詩十五卷。于世
安上之特賜出身。

馮元字道宗。高祖禧。唐末官廣州。以術數仕。劉氏傳三世。至父
邠入朝。爲保章正元。幼從崔熙正。孫奭爲五經大義。與樂安孫
寶。吳陸參。譙夏侯圭。號四友。羣居講學。達旦不寢。登進士。授江

陰尉時詔取明經者補學官元自薦通五經更問疑義辨析無
滯補國子直講遷大理評事崇文館檢討王旦聞其名薦之嘗
令說論語老子羣弟子侍聽既乃尤精於易夢一異人與紉蓮
華使吞之曰善讀此後必大顯真宗召講易泰卦因進說地天
爲泰者以天地之氣交也君道至尊臣道至卑惟上下相與則
可以輔相天地裁成萬化帝悅遷太子中允直龍圖閣詔預內
朝直閣預內朝始此天禧初講易於宣和門北閣遷太常丞兼
判吏部南曹擢左正言仁宗開資善堂兼太子右諭德資其經
術益向學卽位遷戶部員外郎爲直學士兼侍讀歷會靈觀副
使知通進銀臺司尋判登聞檢院與真並命判國子監士議悅
服同知貢舉進龍圖閣學士預修三朝正史改翰林學士史館
修撰判都省三班院并流內銓又兼羣牧使遷給事中明道元

年監護宸妃葬事後因發橫流泉沮洳罷知河陽王曾言東朝舊臣不宜以細故棄外卽召爲侍講學士遷禮部侍郎知審官院復判禮院上金華五箴賜書褒答受詔修景祐廣樂記書成遷戶部侍郎以足疾卒贈本部尚書諡章靖生平多識古今臺閣品式之事質性簡厚不務聲名非處小未嘗過謁二府執親喪自括髮至祥練悉倣古禮不爲世俗薦遇祭日與門生誦說孝經無子以兄之子諡爲後

郭禎字仲徵祥符人世寓鄭州登進士爲河南主簿陳堯咨知大名辟簽書判官事改大理寺丞孫奭馮元奏禎學問通博他莫能及除國子直講薦試學士院爲集賢校理元知河陽又辟爲通判徙河南入爲三司度支戶部判官累遷刑兵二部員外郎同修起居注康定元年使葬丹告用兵西鄙厚加禮貌還知

制誥判吏部流內銓擢龍圖閣直學士權知開封卒頽性和易
文思敏贍刻意詞賦好用經語對頗近於諧聚古書畫不計其
貲購求之幼孤母邊氏更嫁士人王渙生四子母亡禱請解官
服喪知禮院宋郊言爲過禮乃下有司毋議用馮元等奏聽解
官心喪語在禮志

趙師民字周翰臨淄人九歲能文學問精博第進士調諸城簿
孫奭辟爲說書自以爲不及夏竦尤愛重之論其文行稱爲盛
德君子除青州教授改齊州更天平軍節度推官年五十來京
師近臣張觀等列薦任國子直講兼潤冀二王宮教授歷著作
佐郎崇文院檢討崇政殿說書宗正寺簿并丞會趙元昊反罷
進講師民上言帝王治經與臣庶異不獨玩空文占古語也今
西方稍有事臣等卽不復見是以先生典籍可講於無事之時

不足以贊有爲之世。臣愚以爲過矣。仁宗嘉納之。因陳十五事。曰。咨輔相。命將帥。揀侍從。擇守宰。治軍旅。修邊防。求諫諍。延講誦。革貢舉。久官政。謹財用。容誹謗。除忌諱。慎出令。又獻勸講箴。四年春。上御迎陽門。召選臣觀圖畫。復命講經史。遷天章閣侍講。同知貢舉。進待制。同判宗正寺。在經筵十餘年。甚見器異。嘗講詩如彼。流泉口水之初出。喻王政之發。順行則通。通故清潔。逆亂則壅。壅故濁敗。賢人用。則王政通。而世清平。邪人進。則王澤壅。遏而世濁敗。幽王失道。用邪紂正。正不勝邪。雖有善人。不能爲治。亦將相牽而淪於污濁也。帝問水何以喻政。對曰。水順行而潤下。利萬物。故以喻政。此於此典義最大。後講論語修文德。曰。文者。經天緯地之總稱。君人之道。撫之以仁。制之以義。接之以禮。講之以信。皆是然所先者。又無若信。信者。君人之大本。

仁義禮樂皆必由之。此實至道之要。復問鑽燧收火曰古之聖王舉動必順天時。所以四時變火各隨本色。近世漸務苟簡。以爲非治具而遂廢之。至其萬事皆不如古。又問子夏子張所言交道孰勝。曰聖哲之道。舍履廣大與天地參善者。有以進德。惡者俾之改行。子張之言爲優。他日讀漢記問長安城衆莫能知。師民因陳。自古都雍。年世舊址所在。若晝諸掌。帝悅曰。何其所記如此。偶盛夏屬疾。帝飛白書團扇爲和平字。賜以寄意。累請補郡。除龍圖閣直學士。知耀州。御寫詩寵行上。以儒林舊德。目之將行。疏曰。近觀太陽食於正朔。其月在亥。亥爲水。水爲正陰。其日在丙。丙爲正陽。詩曰。十月之交。朔日辛卯。謂以陰奸陽。失其叙也。曰。百川沸騰。山冢峩崩。高岸爲谷。深谷爲陵。謂下陵上。侵其權也。至皇甫卿士。番惟司徒家伯冢宰中允。膳夫栗子內。

史蹶惟趣馬橋惟師氏此則大小之臣皆不得其人也。凡天之示象非由人君有失則下蔽其上。人君之失不過暴虐怠慢奢侈縱放不師古始非是何失道之有。今聖心慈仁恭儉動循典禮自非下蒙上邪。撓正使主恩不下。捨此將誰咎歟。望陛下朝夕咨於丞弼心膂之臣察左右近侍耳目之官慎揀內外百執事及州縣牧宰使主恩究於下不爲羣邪之所蔽塞則億兆之幸也。三遷刑部郎中終宗正丞師民淳靜剛敏舉止凝重幼喪父哀毀感慕不畜婢妾年四十四始婚志尚清遠專以讀書爲事性極慈恕勤於吏治政有惠愛嘗奏蠲陝西旱租論權酷諸弊患近世官失其官作正官名議多不載有集三十卷子彥若試中書舍人

冊曰古有作者不約而同其言則是其遇則矇不愧於天

無忝於公

聶冠卿字長孺新安人五世祖師道楊行密版授鴻臚卿號開政先生冠卿登進士授連州軍事推官楊億愛其文薦試學士院校勘館閣書籍遷大理丞爲集賢校理通判蘄州嘗校十代興亡論謬誤落職再遷太常博士復校理言天下奏獄雖笞杖並覆而徒流不繫者乃不以聞非所以矜慎刑罰之意請自今罷覆笞杖罪自徒以上奏覆從之俄判登聞鼓院歷開封三司鹽鐵度支皆爲判官同修起居注累工刑兵三部郎中預撰景祐廣樂記命檢閱事迹遷直集賢院知制誥判太常禮院糾察在京刑獄奉使契丹主謂君家先世奉道子孫固有昌者因擊毬縱飲命賦詩禮遇甚厚還同知通進銀臺司審刑院拜翰林學士判昭文館兼侍讀學士進讀左氏春秋引尊王黜霸之義

以諷內艱起復帝憐其哀毀羸瘠賜湯劑卒年五十五生平嗜學好古手未嘗釋卷尤工詩詞極清麗有斷春集十卷弟世卿太常博士終宣州通判

錢象先字資元蘇州人進士高第呂夷簡薦爲國子直講歷大理少卿度支判官河北河東運使召兼天章閣侍講詳定一路勅成當進階仁宗以其母老特賜紫章服以慰進待制其學長於經術旁通法家侍邇英十餘年有所顧問必依經以對反復諷諭遂旁及當世之務帝禮遇甚渥擢知審刑院持心平恕條令多所裁定嘗以爲犯勅者重犯令者輕請移勅文入令又議告捕法以爲罪有可去有可捕苟許捕則姦人將倚法以害善良因削去許捕百餘事加龍圖閣直學士出知蔡州上諭曰大夫行有日矣宜講徹一編徙知河南陳許潁三州復兼侍講以

吏部侍郎致仕卒年八十一

張揆字貫之范陽人徙齊州擢進士歷北海尉改大理丞以疾解官十年不出戶讀易因通揚雄太玄經安撫陳執中薦經明行淳召爲國子直講轉諸王府侍讀荆王府記室叅軍府罷遷度支員外郎直史館權三司戶部判官上所著太玄集解數萬言詔對邇英閣令揆著得斷首斷首準易之夫蓋以陽剛決陰柔君子進小人退之象仁宗大悅擢天章閣待制兼侍讀一日進讀漢馬后傳因言今妃族太盛不可不裁損使保其家帝嘉納之遷右諫議大夫進龍圖閣直學士給事中判太常寺議王溥周之宰相國亡不能死安得諡文忠詔改文康加翰林侍讀學士知審刑院出知齊州卒贈禮部侍郎爲人性剛狷少容闊畧世務然好學讀書老而不倦與弟揆龍圖閣直學士極相友

愛人以是稱

楊安國字君倚密州安丘人父光輔隱居馬耆山教授學者多從受經州守王博文薦爲太學助教孫奭知兗又薦爲奉禮郎州學講書及馮元薦安國爲國子直講因并召光輔時年已邁仁宗命說尚書光輔奏堯舜之事遠而未易行請講無逸一篇論說明暢帝悅因請書於邇英閣之後屏帝不欲背聖人之言命蔡襄書無逸王洙書孝經四章列置左右尋以國子監丞終老於家安國五經及第爲枝江縣尉遷大理寺丞監益州糧料院景祐初置崇文殿說書安國預選其講說一以注疏爲主尤善緯書久之進天章閣侍講直龍圖閣又爲直學士進翰林侍講學士歷太常寺累遷給事中在經筵二十七年仁宗稱其行義淳質以此崔遵度常講易至鼎卦帝問九四象如何對曰九

四上承至尊下應初爻任重非據故折足覆餗蓋任得其人則雖重可勝非其人必有顛覆之患帝稱善又講周官至大荒北則薄征緩刑因進曰古所謂緩刑乃過誤之民爾今衆持兵仗取民廩一切寬之恐無以禁姦帝曰不然天下皆吾赤子迫於餓莩至起爲盜州縣旣不能振恤乃捕而殺之不亦甚乎與父皆七十餘卒贈禮部侍郎

杜鎬字文周無錫人南唐虞部員外郎昌業之子幼好學博貫經史兄爲法官有子毀父畫像爲旁親所訟疑其法鎬引僧道毀天尊佛像爲比兄奇之舉明經解褐集賢校理入直澄心堂江南平授千乘縣簿舊儒多薦其能太宗改國子監丞崇文院檢討將祀南郊值彗星見鎬言當祭而日食猶廢况謫見如此乎趙普言於上罷其禮遷著作佐郎左贊善大夫賜緋魚歷殿

中丞國子博士秘閣校理上嘗詢以經義進對稱旨願遇甚厚
問西漢時賜與悉用黃金何近代爲難得之貨鎬言是時佛教
未興故金價甚賤又問天寶梨園事敷奏詳悉遷虞部改駕部
皆員外郎加賜金帛判太常禮院與朱昂等編次館閣書籍預
修冊府元龜歷虞部都官司封郎中賜金紫復直秘閣會修太
祖實錄命檢討故事以備訪問景德初置龍圖閣待制因以命
之從幸澶淵遇懿德皇后忌辰疑軍中鼓吹之禮鎬以武王載
木主伐紂前歌後舞爲對拜右諫議大夫又遇置龍圖閣直學
士班在樞密直學士下亦以授鎬賜襲衣金帶儒者榮之王欽
若僞造天書帝尚猶豫會幸秘閣驟問曰古者謂河出圖洛出
書果何事耶鎬老儒不測其旨漫應曰此聖人以神道設教爾
帝由此意決祥符中同詳定東封儀注遷給事中三年又充本

閣學士上日賜宴秘閣御制詩以賜進工禮二部侍郎卒年七十六錄其子渥大理寺丞及孫植杞樞官鎬有懿行博聞強記凡有檢閱某事某書某卷某行悉能記憶得異書召問必手疏本末以聞士大夫亦多訪以古事雖晚輩卑品請益應答無倦日治經史或遇直館四鼓起誦所居僻陋僅庇風雨暇日多挈醪饌待賓友性和易清素士類推重獨以一言贊成天書之妄讎者恨之杞字偉長廕補將作監簿知建陽強敏有才禁民生子不舉累遷虞部員外郎知橫州時安化蠻寇邊諸郡咸無城郭甲兵之備橫爲邕欽廉三郡咽喉地勢險阻可屯兵爲援請擇大臣識權變練達嶺外事者使經制之詔可改通判真州徙知解州權發遣度支判官盜起京西掠商鄆均房焚光化軍授杞京西轉運按察使數月賊平又廣西區希範誘白崖山蠻

蒙趕反衆數千襲破環州帶溪普義鎮寧五砦嶺外騷然懼杞
爲刑部員外郎直集賢院廣南西路安撫先以書諭蠻許自新
不聽乃勒兵攻破白崖黃坭九居山砦及五洞焚毀積聚斬首
百餘級復環州賊散走荔波洞遣使誘之窮蹙遂降杞語將佐
曰賊所以數叛以我威不足制故思不能懷不如盡殺之乃醢
希範以遺諸蠻賊皆畏慄御史梅堦劾其殺降失信詔戒諭之
徙兩浙與河北拜天章閣待制環慶路經畧安撫使知慶州有
蕃酋率衆內附夏人來索以兵劫邊戶掠馬牛杞移檄夏人言
不償所掠則酋不可得旣而兵亦罷去一日據厠見希範與趕
訴冤叱之未幾卒年四十六杞性強記博覽書傳通陰陽數術
之學有奏議十二卷 植以文雅知名累任監司終少府監
樞亦強敏爲比部員外郎中書遣訊張彥方事語連越國夫人

開封不敢窮治樞揚言將駁正之故權倖切齒坐微罪出監衡州稅卒

丁度字公雅恩州清河人祖顓徙祥符父逢吉以醫術事真宗藩邸好聚書與儒者遊度強力學問通尚書祥符中登服勤詞學科爲大理評事通判通州改太子中允直集賢院坐舉解失實謫監齊州稅還知太常禮院判吏部南曹上六事一增講讀官二增諫員三補大功以上廕官四選役兵補禁軍五聚令佐墾田爲殿最六凡緣公事坐杖者聽保任遷官太后善之舊制監司及藩鎮辭謁皆賜對仁宗初止令附中書樞密奏之度言非所以防壅蔽又獻王鳳論於太后以戒外戚歷三司磨勘司京西轉運使永昌陵有白氣司天萌筭以厭之詔度按視奏神道貴靜不可輕繕乃止入知制誥遷翰林學士糾察在京刑

獄兼羣牧使劉平敗帝問禦邊之計度條上十策名曰備邊要
覽言符堅以百萬師寇晉謝安命駕出遊以安人心今二府三
司以西邊一隅雖旬休不廢務恐外邦聞之得窺朝廷請許給
假如故遷中書舍人學士承旨葉清臣奏鑄大錢以一當十度
言自來錢法輕重大小時嘗更易不能期年卽復改鑄今邊戍
月給百錢大錢裁十不可畸用舊錢不用新錢愈輕徒增芻糧
之價長盜鑄之奸又言祥符天聖間牧馬至十餘萬其後天下
無事遂廢八監然猶於秦渭環階麟府文州火山保德岢嵐等
處嘗歲市以補京畿塞下之闕自西鄙用兵所牧三萬而已馬
少地闕誠可痛惜請令河北河東京東西淮南民畜一戰馬者
得免二丁言皆施行慶曆中副杜衍宣撫河東還瑞明殿學
士知審刑院大理論吉州通判李虞卿受財免貼納鹽鈔錢事

覺當以枉法從重度駁枉法謂於典憲有所阿曲虞卿所違轉
運使移文爾遂得貸死帝問用人資與才孰先對曰承平宜用
資事急宜用才許者指爲自求柄用帝諭輔臣度在侍從十五
年數論天下事未嘗及私安得爲此言擢爲工部侍郎五年拜
樞密副使請擇河北河東陝西就糧馬軍以補禁旅之闕又言
契丹備不可忽上慶曆兵錄五卷贈遺錄一卷踰年叅知政事
春旱降中書舍人閔月復官會衛士爲變樞使夏竦請御史同
宦官鞠於禁中度請付外臺窮治爭於上前上從竦言度遂求
解政爲置觀文殿學士處之仍兼侍讀俄知通進銀臺司判尚
書都省終尚書左丞贈吏部尚書謚文簡度性淳質不外飾居
一室十餘年左右無姬侍嘗喜論事在經筵久帝每呼學士不
名問以著龜占應之事對曰卜筮雖聖人所爲要之一技而已

不若以古人治亂爲監。又與觀歎器真宗嘗著論曰朕欲臨天下以中正之道對曰臣等亦願無傾滿以事陛下遂於御製後述以賜之所著有邇英聖覽龜鑑精義編年總錄武經總要子諷集賢校理

燕肅字穆之其先益都人父峻慷慨任俠楊光遠反時率其屬迎符彥卿遂家曹州肅少孤貧遊學登進士補鳳翔觀察推官寇準薦改著作佐郎知臨邛縣移考城通判河南歷提點廣南東西兩路刑獄丁謂惡之出知越與明州爲海潮岡著潮論二篇以獻召入直昭文館爲定王府記室叅軍判刑部建言京師大辟皆許覆奏而州郡所上疑獄及情可憫者多爲法司所駁反得不應奏之罪願如京師覆奏許之其後大辟上請者多得貸議自肅始擢龍圖閣待制權審刑院出知梓州還同糾察在

京刑獄累遷左諫議大夫知亳州屬歲歉兼京東安撫使入判太常造指南車記里鼓車及欵器以欵舊時鐘磬皆設色每三歲親祠則重飾之歷歲久遠所塗積厚聲益不協詔與李照宋祁同按刻滌考擊合以律準試於後苑聲音始協又詔與章得象馮元詳定刻漏上蓮花漏法詔司天臺考與崇天曆不合然所至皆刻石以記其法州郡用之以候昏曉推其精密久之進龍圖閣直學士知穎州終禮部侍郎致仕平生喜爲詩多至數千篇性精巧能畫圖山水卷布濃淡意像微遠尤喜爲古木折竹咸入妙品 子度字唐卿登第調知陳留旱蝗勸豪出粟行保伍法善狀日間擢通判永興軍三司王堯臣薦權發遣戶部判官出知滑州與黎陽封境河埽下臨魏都悉以已儲芟榷往禦埽賴不潰皇祐中使益州還權河北運副坐六塔河決貶知

蔡州徙福州福多盜請假事權制攝加兵馬鈐轄入爲戶部副
使以右諫議大夫知潭州卒年七十度有心計凡六佐大農慶
曆中三司請榷河北鹽度言川峽不榷酒河北不禁鹽此祖宗
順民俗不易之制也榷之非是與張方平論同議遂寢 孫瑛
字仁叔廬除瑕丘尉以好言論盜盜爲衰止累遷太府丞開封
少尹歷廣東運判進副使連直秘閣龍圖在嶺嶠七年務括犀
珠香藥以奉宰相守臣任滿察其典崇教法拯葺道官爲善最
拜戶部侍郎轉開封尹兼侍讀至戶部尚書靖康初知河陽金
兵入不能禦爲亂兵所害年五十建炎初贈端明殿學士

劉夔字道元崇安人第進士補廣德判官累遷屯田員外郎權
侍御史會李照改製大樂鐘磬夔奏樂之大本與政化迥不當
輕易其器願擇博學之士以補卿丞凡四方獻妄說以要進者

請一切罷之。帝善其言。歷三司戶部判官判度支勾院。江西兩浙淮南轉運使。除直史館。知陝西。改太常少卿。知廣州。所至有廉名。權三司度支副使。桂陽監蠻酋唐和寇邊。夔以右諫議大夫龍圖閣直學士知潭州。兼湖南安撫使。初至。遣人諭降。和不從。乃舉兵擊敗和於銀江源。進破其巢穴。蠻逃遁遠去。境內獲安。還權判吏部流內銓。知審刑院。河北大水。民流爲盜。詔增京東守備。進夔給事中。樞密直學士。以往至卽發廩賑饑。全活甚衆。盜賊衰息。上賜書褒諭。大臣議欲復河故道。夔極言不可。遂罷。遷工部侍郎。知福州。以戶部侍郎致仕。嘗遇隱者。得養生術。蔬食獨處。退居一閤。家人罕見其面。至老手足耳目強明如少壯時。不治財產。所收私田餘穀以賑鄉里。貧人英宗卽位。改吏部侍郎。前數日。自作遺表。分祿賜所餘於親族。告其家人如期。

而卒年八十三

馬亮字叔明合肥人登進士調大理評事知蕪湖遷殿中丞通判常州吏民緣失官錢連逮妻孥亮緩與之期後盡輸所負羅處約使江東以治行聞擢知濮州轉福建糾察刑獄覆訊冤獄多所全活遷太常博士知福州蘇易簡薦亮才堪繁劇召還同提點三司都勾院磨勘憑由司出知饒州豪右白氏執吏短長殺人爲患部中畏懾亮至按誅之鑄錢監銅錫不給匠多閑冗亮請分其半別置監於池州歲增鑄十萬緡遷殿中侍御史上言故事親王尹開封地尊勢重嫌隙易生願鑒其由以示保愛之意真宗初政上書言軍賞宜速而所在不時給赦書蠲逋而有司歛愈急宜檢會督責以寬民益軍募丹仍歲南侵河朔蕭然亮請修好以息邊民帝善其言以爲可用討王均加直史館

爲西川運副奏言。愚民脇從。竄伏山林者衆。若不速貸。恐反側聞風疑懼。是滅一均。生一均也。帝悟。凡詿誤械送闕者。悉宥之。全活千餘人。城中米斗千錢。亮出倉廩。減其價。以糴人賴以濟。時諸州鹽井。歲久泉涸。而官督負課。繫捕者衆。亮爲釋繫者。奏廢其井。又除屬部舊逋官物二百餘萬。還知潭州。徙昇州。歲旱。民饑。願罷官糴。令民轉粟。相賙。擢右諫議大夫。知廣州。時初平。宜州賊陳進。貸脇從者家屬二百餘人。鹽戶逋課。質其妻子於富室。悉取還之。招來蕃舶至者。以倍大駕。東封。亮敦諭大食。陀婆離。蒲舍沙等國貢方物。泰山下歷知皮洪二州。江陵府遷工部侍郎。集賢院學士。知杭州。江濤溢。築堤未就。亮禱於伍員祠。下潮爲之却堤。遂成。入拜御史中丞。建言。士民父祖未塋。毋得輒析財產。又改兵部侍郎。兩知廬州。江寧。仁宗初。歷尚書右丞。

判尚書都省知審刑院遷工部尚書知毫與江陵以太子少保致仕卒贈右僕射爲人有智畧敏於政事然所至無廉稱呂夷簡少時從其父蒙亨爲縣福州亮一見奇之妻以女陳執中梁適田況宋庠宋祁皆厚遇之世故目爲知人 子仲甫字子山舉進士知登封縣輟轍道險隘仲甫傭民鑿平之遂爲坦塗人便其行勒石頌美擢通判趙州久之除知台州入爲度支判官內侍楊永德言漕舟行淮汴間惟水遞舖爲便詔偕往視可否還言十害議遂格出爲夔路轉運使歲饑減盜粟罪一等發遣而後奏尋徙淮南時真揚諸州地狹米少因官糴多價常倍踊登萊濱海粒米狼戾農無所售請兩移以舒其患且咸有益從之遷發運使自淮陰徑泗上游歲懼風波仲甫議鑿洪澤渠六十里漕者便之拜天章閣待制知瀛州徙秦州古渭介青唐之

南夏人之北中通一徑小警則路絕仲甫至求得筭栗城故址自雞川砦築堡北抵南谷環數百里爲內地詔賜名甘谷堡熙寧初守亳許揚三州糾察在京刑獄知通進銀臺司終提舉崇禧觀

洪湛字惟清上元人會祖勳南唐崇文觀學士祖壽桐城令父慶元奉禮郎補新喻令歸朝改寃勾令湛幼好學五歲能詩未冠錄所著爲齡年集雍熙二年舉進士有聲擢高等解褐歸德軍節度推官還授右拾遺直史館端拱初通判壽許二州與尹黃裳王世則宋沆伏閣請立許王元僖爲儲貳太宗怒出知容州偵知戍卒謀竊發湛斬之遷比部員外郎歷知柳舒二州咸平二年召還命試舍人院與閣門祇候韓紹輝使荆湖按視民事條奏利病甚悉還判三司都磨勘司與王欽若同知貢舉未

幾同修起居注時議城綏州邊臣互言利害遣湛與閤門祇候
程順奇同往按視湛言七利二害遂詔營葺終以勞人而罷湛
美風儀俊辯有材幹凡五使西北議邊要真宗有意擢任顧遇
甚厚曲宴苑中賦賞花詩浚被褒賞以前知貢舉受賄事敗時
欽若方被寵乃駕禍於湛坐法當死詔削籍流儋州後遇赦移
惠州卒年四十一有集十卷子鼎登祥符進士至度支員外郎
直史館終鹽鐵判官

弘簡錄卷一百二十七

終

弘簡錄卷一百二十八

明刑部員外郎仁和弘齋邵經邦學

皇清翰林院侍講學士四世孫遠平校閱

侍從 宋四之五

晁迥

子宗慤

戚綸

任布

薛映

王博文

子瞻

周起

王曙

子益恭

李若谷

子淑孫壽

薛奎

蔡齊

從子延慶

王巖

李諮

盛度

程琳

晁迥字明遠澶州人父仝徙彭門迥登進士調大理評事岳州錄事叅軍歷將作監殿中太常三丞呂端李沆薦擢右正言直史館獻咸平新書五十篇理樞一篇召試除右司諫知制誥判刑部加右諫議大夫爲雍王元汾留守判官進翰林學士同修

國史未幾知審官院充明德章穆園陵禮儀使祥符元年知貢
舉封泰山祀汾陰同太常詳定儀制累遷工部侍郎使契丹還
奏北庭記兼史館修撰知通進銀臺司獻玉清昭應宮頌子宗
操繼上景靈宮慶成歌帝以父子皆有文章爲縉紳美事擢刑
兵二部侍郎翰林承旨朝廷方修禮文之事詔令多出其手嘗
夜召對令內侍持燭送歸院方盛暑爲蠲宿直迺辭以非故事
詔聽俟秋涼還直拜工部尚書集賢院學士判留司御史臺仁
宗時轉禮部尚書以太子少保致仕天聖中年八十一名宴太
清樓特免舞蹈子宗慤同預坐賜飛白大字所以寵賚甚厚進
太子少傅復召對延和殿訪以洪範雨暘之應對曰比年災變
洊臻天所以警陛下願修飭政事以當天心仍獻斧戣慎刑箴
大順審刑無盡燈頌凡五篇迺素善養生通吐納之術釋老之

言以經傳傳致爲一家之說及感疾絕人事屏醫藥具冠服乃卒年八十四罷朝一日贈太子太保諡文元迥性樂易寬簡服道履正雖貴勢無所屈歷官臨事未嘗挾情害物喜質正經史疑義標括字類真宗稱爲好學長者楊億謂所作書命無過褒得代言之體有以命術語之者答曰自然之分天命也樂天不憂知命也推理安常委命也何必逆計未然乎所著翰林集三十卷道院集十五卷法華碎金錄十卷者智餘書隨因記述照德新編各三卷 宗慤字世良初廕校書郎召試賜進士及第除館閣校勘遷大理寺丞集賢校理兼注釋御集檢閱官求便養親通判許州仁宗遷殿中丞同修起居注轉對請減上供壘閑田擇獄官令監司舉縣令累遷祠部員外郎知制誥時父尚無恙宋綬謂自唐楊於陵以來今始見焉內外喪皆起復管勾

會靈觀拜翰林學士兼龍圖閣權發遣開封府事辨雪疑獄有能名元昊反使安撫陝西密訪邊事與夏竦議攻守遂上十事頗施用之康定初拜右諫議大夫叅知政事朝廷賜旃廝羅金飾胡牀及金抹器宗慤引孔子繁縷之事爲戒俄從郊祀感疾罷爲給事中資政殿學士數日卒贈工部尚書諡文莊爲人性敦厚事父母孝篤於故舊凡任子惠皆先其族人嘗草將相五制一夕而成褒揚訓戒人得所宜

戚綸字仲言父同文別有傳綸少與兄維俱以文行知名篤於古學喜談名教登進士調沂水簿父憂起復以大理評事知泰和縣江外民險悍喜訟綸爲諭民詩五十篇因時俗耳目之事以申明規誨老幼多傳誦之遷光祿丞免官著道理評十二篇錢若水王禹偁深加賞重復知永嘉有政蹟浚治境內陂塘之利

以備水旱詔褒之轉著作佐郎楊徽之薦其文學純謹命爲秘閣校理考校司天臺職官定州縣職田條制改太常丞判登聞鼓院內府出緡帛市邊糧詔乘傳往均之景德元年判三司賜緋魚改鹽鐵判官拜右正言龍圖閣待制賜金紫上以綸久次州縣熟於吏事每便殿與語必移晷刻或夜中召見多所敷啓因據十事以上一王畿關輔二五等封建三復制科四崇國學五闢曠土六修貢舉七任大臣八置平糴九益廂軍減禁兵十修六典令式詞頗切實連被嘉獎預修冊府元龜二年同知貢舉規畫取士之法多納用焉會置官百三十司總在京諸司之務與劉承珪同領其事改判鴻臚寺品官葬費無式詔同晁迥朱巽承珪校品秩之差定爲制度遵行又以三公尚書九列之任唐末以來品目漸繁宜采通禮六典令式以類沿革著爲大

典時論稱之擢右司諫兵部員外郎奏請開獎言路許諸臣上封及非次升殿奏事上頗納之祥符元年掌吏部選值朝廷修禮彌文悉叅其議與陳彭年並職屢召對多建條式恩寵甚盛上初受靈文綸請述修大祀命侍從摹寫祥符勒於嘉玉藏之太廟傳示萬葉冬封泰山命同計度發運事禮成遷戶部郎中直昭文館同編東封祥瑞記兼集賢修撰建議修釋奠儀頒於天下立常平倉隸司農寺以平民糴皆從之上宴餞种放於龍圖閣命綸爲序稱其有史才三年擢樞密直學士賜詩寵之祀汾陰復領發運之職晚節爲權倖所排出知杭州就加左司郎中立埽岸以扞江湖易柱石之制發運使胡則劾其變法改揚徐二州又罷學士徙青州歲饑發公廩賑救全活者衆勸農使王遵晦復奏請左遷岳州團練副使易和州改保靜軍副使

以疾巧歸轉太常少卿分司南京卒年六十八生平敦篤信義厚於故舊士子謁見必詢其所業訪其志尚隨才誘之多所引薦一奏嘗十數人皆當世名士每云歸老後得十年在鄉間講習亦可以恢道濟世善訓子弟不改純儉遺戒誘勸爲學沒無餘貲知府張知白輟俸以助其喪有集二十卷論思集十卷錄前後奏議機務利害備邊均田之策天聖中子舜賓獻之得贈諫議大夫後里民曹誠卽舊居旁造舍聚書延生徒講習詔賜額爲同文書院命舜賓主之擢爲奉禮郎至太子中舍署誠本府助教

任布字應之河南人後唐相國四世孫力學家貧從人借書以讀及第補安肅軍判官勅問罪丹事布上言請飭邊備奏河北利害真宗識其名特改大理寺丞知安陽縣通判嘉州還知開

封司錄事通判大名府初置提點刑獄選領荆湖南路入權三
司鹽鐵度支勾院以論築祥源觀忤丁謂意降監鄧州稅連知
宿建越三州選職方員外郎謂貶乃擢布爲白波發運使判三
司開拆司出授梓州路轉運奏除富順監鹽井歲課權戶部判
官轉江淮置制發運使歷三司度支鹽鐵副使使契丹還復爲
館伴加直史館歷祠兵刑三部郎中右諫議大夫知荆南真定
二府值契丹西夏方窺中國築甬道屬渾沱河跨絕泥濘徙滑
州改天雄軍遷給事中集賢院學士知許州未幾爲龍圖閣直
學士徙澶州康定中知河陽數上書言事請鑄大錢一當十召
爲樞密副使布純約自守秉政之日無所建明御史魚周詢劾
子孫曩上書詆大臣不才罷爲工部侍郎知河陽改蔡州以太
子少保致仕皇祐間陪祀明堂進少傅賜子達出身俄遷少師

歸洛作五知室謂知思知知道知命知足知幸也卒贈太保諡恭惠達性亦恬遠尚釋氏學歷官司封郎中

薛映字景陽唐相元超八世孫後家於蜀父允中事孟氏爲給事中歸朝改都官郎中映及第授大理評事歷通判綿宋昇三州遷太常丞知開封縣王化基薦太宗召對歷江南京東轉運使監察御史改左正言直昭文館江淮兩浙河東茶鹽制置副使兼河西隨軍轉運求便養親知相州再領漕京東遷禮部郎中擢知制誥權判吏部流內銓兼制置羣牧司以右諫議大夫知杭州臨決明敏庭無留事發運使姚鉉納部內女口及鬻鈔器抑市綾羅數事推勘得實鉉得貶映坐常召人取告鉉狀當贖金真宗特貰之在杭五年入知通進銀臺司兼門下封駁事封泰山爲東京留守判官遷給事中勾當三班院出知河南祀

汾陰還駐蹕西京知映有治狀御書嘉獎遷工部侍郎判集賢院進樞密直學士知昇州民計牛出賦牛死租不得蠲映悉爲條奏得與諸州悉蠲之未幾糾察在京刑獄歷尚書左丞知揚并二州徙永興軍拜工部尚書兼御史中丞仁宗改禮部尚書集賢院學士出知曹州分司南京卒贈右僕射諡文恭映好學有文博覽強記善筆札章奏尺牘下筆立成政尚嚴明吏不能欺每五鼓冠帶黎明據案決事雖寒暑無一日異子耀卿秘閣校理孫紳直龍圖閣

王博文字仲明曹州濟陰人祖諫給事晉邸除西京作坊副使卒官廬州博文幼孤未冠善屬文廬守劉蒙叟薦召試舍人院歷安豐簿南豐尉皆有能名調南劍州軍事推官遷大理殿中二丞監荆南權貨務陳堯咨薦試中書賜進士擢知濠真二州

真宗幸亳權江淮制置司事改監察御史梓州路轉運使連知
海客二州民饑多盜警塲鹽博文請弛其禁候歲豐復禁從之
除殿中侍御史乘驛按朱能王先僞天書事能死先與其徒就
擒罪其首惡脇從悉以減論還爲開封判官母憂服除判三司
戶部改河北陝西轉運使遷侍御史屬羌撤遁渴寇原州柳泉
鎮環州鶻鵠泉砦刺史杜澄崇班趙世隆戰沒博文劾奏都知
周文質押班王懷信提兵玩寇遂坐以法朝用曹瑋知永興軍
節制邊事田敏爲涇原總管寇遂平遷兵部員外郎三司戶部
副使再轉郎中龍圖閣待制判吏部流內銓權發遣三司事與
御史崔暨同鞠曹汭獄議者多謂希太后旨縱內侍雖崇勳傳
致其罪還權知開封進龍圖閣直學士知秦州爲承受買德昌
所毀徙鳳翔與永興軍德昌以賊敗博文改樞密直學士復知

秦州擇習知邊事者使密持信紙往招沿邊逃亡軍民悉貸其
罪歲減死甚衆有擒生羌以歸賞以錦袍銀帶茶絹朝廷下其
法旁路又河西回鶻多緣互市家秦隴間至則悉遣出境戒守
臣使譏察之遷右諫議大夫龍圖閣學士復知開封置表木按
籍邸舍不得侵通衢出知大名遷給事中權三司使寶元初同
知樞密院事踰月卒帝臨奠贈吏部侍郎博文初以吏事進多
任繁劇然爲政務平恕嘗語諸子吾平生夾流罪未嘗不陰擇
善水土處汝曹志之 子疇字景葵廕補將作監簿復中進士
遷太常博士學士宋祁提舉諸司庫務薦除勾當公事耻與內
官同事不就賈昌朝再薦編修唐書仁宗獵近郊疇引十事以
諫又獻聖政惟公頌名試除直秘閣爲開封推官宦者李允良
與叔父有怨誣爲警家所毒請發棺驗視疇不可而止歷三司

判官修起居注知制誥權判吏部流內銓以右諫議大夫權御史中丞唐介奏彈陳升之謂爲遊談所誤瞻疏言浮華險薄之徒往來諫官御史家持摭人罪寢以成俗請詔戒勵從之還給事中請英宗御朝聽政仁宗當虞祭上命以宗正卿攝事瞻奏言人子之葬其親送形而往迎神而返故虞祭所以安神也位尊者禮重禮重則祭多故天子之虞數至於九今陛下不得親往山陵道路五祭或可命臣下攝事若神主旣至已後四祭雖聖躬未寧亦宜勉強矧陛下素以好古知禮聰明仁孝聞於中外臣願始終令德以全美名帝已御殿受朝而聽政猶持謙抑瞻復奏陛下起居安平廟社擁祐臨朝以時近踰半載未聞開發聽斷德音邇遇人情歉然伏望思祖宗艱難之勞眞仁憂勤之德亟決大政以慰母后之心又欲車駕行幸以安衆志帝因

禱雨而出。都人瞻仰。懽呼數日。皇太后還政。嚮復請二府大臣講求所以尊榮母后之禮。嚴奉歲時朔望之儀。車服承衛之等。百司供擬之制。他時尊稱之號。外家延賞之恩。凡可以稱奉親之意者。皆宜優異。以發揚母后之功烈。則孝德昭於天下矣。學士王珪等與禮官上議。季秋大饗。宜以仁宗配。知制誥錢公輔又言。不當配時。獻議謂如珪議。則遣真宗。如公輔議。又非嚴父配天之義。乃請仁宗配饗明堂。以符大易配考之說。奉真宗配孟夏雩祀。以倣唐貞觀顯慶舊典。餘依本朝故事。如此。則列聖並侑。對越昊穹。厚澤流光。垂裕萬祀。帝與大臣言其論事有補。深器異之。遷翰林學士。禮部侍郎。同提舉諸司庫務。數月。拜樞密副使。公輔言。嚮望輕資淺在臺。素餐不宜大用。居位五十五日。卒。帝悼惜。臨哭。賜白金。贈兵部尚書。諡忠簡。嚮本以名臣子。

性介特厲風操喜言朝廷事好治容服坐立巖然言必以文未嘗慢戲吏治審密文辭嚴麗執政未久輒終於位及所享壽皆類其父云

周起字萬卿鄒平人生而豐下父意異之曰必起吾門因名起幼敏慧如成人纔十三父知衛州坐事削官起詣京師訟寃乃得復故登進士授將作監丞通判齊州擢著作佐郎直史館戶部度支判官真宗北征領隨軍糧草事以右正言知制誥權判流內銓尋判東京留守兼登聞鼓院封泰山攝考制度副使所過採訪官吏能否及民利病以聞駕還近臣悉頌功德起獨以居安爲戒進金部員外郎判集賢院初置糾察刑獄司凡諸事已決或有所在官吏非理榜掠者並聽受訴命起領之擢樞密直學士權知開封聽受明審舉無留事上嘗尹此名其堂曰繼

照避不敢居請就西廡從之一日奏事殿中適仁宗始生帝曰卿知喜乎宜賀我有子卽入禁中懷金錢出探以賜改勾當三班院兼判登聞檢院從祀汾陰權知河中徙永興與天雄軍所至有風烈數賜書褒諭遷右諫議大夫知并州拜給事中同知樞密事進禮部侍郎爲樞密副使坐寇準黨罷以戶部郎中知青州降太常少卿知光州稍遷秘書監徙揚杭二州改應天府復爲禮部侍郎判登聞鼓院以疾知潁州徙陳州卒贈禮部尚書諡安惠爲人天性周密凡奏事及答禁中語隨輒焚草故其言外人無知者家藏書至萬卷與弟超皆能書集古今人書并所更體法爲書苑十卷超官主客郎中子延荷以孝友聞官殿中丞延傳頗雅厚官太常少卿

王曙字晦叔隋東臯子績之後移家河南登進士調定國軍節

度推官咸平中舉賢良方正科遷著作佐郎知定海縣遷爲羣
牧判官考集古今馬政爲羣牧故事六卷上之遷太常丞判憑
由理欠司坐舉士失實降監廬州茶稅再遷工部員外郎龍圖
閣待制以右諫議大夫爲河北轉運使坐部吏受賕降知壽州
徙淮南轉運勾當三班院權知開封以樞密直學士知益州繩
盜以峻法賦無輕重一切戮之有卒夜告其軍謀作亂瞞立辨
其僞斬之蜀人股慄羣盜屏息以比之張詠詠嘗以季夏糴廩
米似此時估減三之二以濟貧民立保甲法一家犯罪一戶皆
坐以此少犯法後至者改詠之法窮民無所濟復爲寇至是復
之蜀人爲之謠曰誰人最良先張後王惠我赤子俾無流亡何
以報之俾壽而康入除給事中仁宗在東宮與李廸同兼太子
賓客妻父寇準罷降知汝州貶郢州團練副使起爲光祿卿復

給事中歷知襄汝潞三州河南永興軍潞有殺人獄已具曙疑之既而提刑杜衍果辨其事因作辨獄記以戒官吏召除御史中丞兼理檢使玉清昭應宮災曙言先帝建此非應經義特信方士邪說蠹耗財用災變之來若有警者願除其地以應天變乃詔不復修繕俄以工部侍郎叅知政事有疾改戶部侍郎資政殿學士知陝州徙河陽遷吏部侍郎明道二年召爲樞密使景祐元年同中書門下平章事逾月卒贈太保中書令諡文康曙方嚴簡重有大臣體居官淡自抑損喜浮圖法齋居蔬食泊如也初錢惟演守西京歐陽修尹洙爲官屬頗事遊宴曙後至嘗厲色戒之曰諸君縱酒過度不知寇萊公晚年之禍耶修起對曰萊公正坐老不知止爾曙默然終不怒及爲樞密首薦修等入館閣曙有集四十卷周書音訓十三卷唐書備問三卷

莊子旨歸三篇列子旨歸一篇載斗奉使錄二卷集兩漢詔議四十卷 子益恭字達夫以廕補衛尉丞性恬淡數解官就養父喪終以司門員外郎致仕閒與浮圖隱者出遊洛陽名園山水無不至子復登朝累遷司農少卿卒 益柔字勝之少通羣書爲文日數千言尹洙見之曰曠而不流制而不窘語淳而厲氣壯而長未可量也司馬光嘗語人曰自吾爲資治通鑑人往往求觀讀未竟一紙輒欠伸思睡能閱之終篇者惟王勝之耳其好學類此性伉直尚氣喜論天下事以廕至殿中丞元昊叛上備邊選將之策又寓書宣撫杜衍丁度言河外兵餽無法非易帥臣轉運不可因條其可任者二人衍還薦其學術政事擢知介丘屢膺黨議起益柔上書論辯言尤切直尹洙與劉滬爭城水洛事坐貶益柔訟之曰水洛一障不足以拒賊劉滬一裨

將沐以天子命呼之不至戮之不爲過况沐執以聽命上尊朝
廷未見其有罪也不報范仲淹薦召試館職以不善詞賦特命
爲策論除集賢校理坐蘇舜欽宴會於席上醉作傲歌賈昌朝
陰主之張方平宋祁王拱辰列狀言益柔罪當誅韓琦言益柔
乃狂譏何足深較方平等陛下近臣今西陲用兵大事何限
一不爲陛下論列而同狀攻一王益柔此其意可見矣帝悟出
監復州酒久之歷開封推官鹽鐵判官諭中旨所需不應法式
有司迎合以求進者悉罷之俄累遷兩浙京東西轉運使熙寧
元年入判度支審官院轉對言人君莫難於辨邪正邪正之辨
莫大於置相一相忠邪百官賢否係之若唐高宗之李義甫明
皇之李林甫德宗之盧杞憲宗之皇甫鏞其明鑒也高宗德宗
昏蒙固無足論明皇憲宗之聰明乃亦蔽於二人如此夫以二

人之庸。猶足致禍。而況詞六藝挾才智以文致其姦說者哉。意蓋指安石也。不聽。尋判吏部流內銓。舊制選人當改京秩滿十人乃引見。故士多困滯。且遇舉者有故輒不用。益柔請二人卽引見。衆論翕然稱之。改直舍人院知制誥。兼直學士院。董璣遇明堂恩。中書狀加光祿大夫而舊階已特進。益柔以聞。帝曰。非學士言。幾爲羌人所笑。宰相怒其不申中書。用他事罷之。遷龍圖閣直學士。秘書監。歷知蔡揚毫三州。江寧應天府。卒年七十。

二

李若谷字子淵。徐州豐人。少孤。遊學依姻家趙况於洛。遂葬父。母緩氏登進士補長社尉。州葺兵營。課民輸木。吏多苛苦。輸者欲以取賕。若谷爲程置庭中。別其長短大小。使民自輸。改大理丞。知宜興。官市置籍勾檢。湖汙茶稅。習例茶惡者沒官。若谷請

民轉貸以償其數民甚便之移知連州真宗將朝太清選通判
亳州遷度支員外權三司戶部判官出爲京東轉運使會河決
白馬調取芻蕘同列盧士倫意趣刻擾而若谷寬之士倫不悅
構於朝徙知陝州盜聚青灰山遣牙吏招降之改梓州天聖初
判三司戶部勾院使契丹陞辭不俟垂簾請對遽詣長春殿奏
事罷知荆南郡有士族恃廕屢犯法若谷杖之曰吾代若父兄
訓爾王蒙正挾太后姻爲駐泊都監橫肆若谷繩以法監司右
蒙正奏徙知潭州累遷太常少卿集賢殿修撰知滑州河齧韓
村堤夜馳往督兵爲大埽至旦堤完以右諫議大夫知延州延
有東西兩城夾河夏秋水溢岸輒圯役費不可勝若谷乃疊石
版押以巨木後不復壞官倉依山而貯穀少使作露囤可貯二
萬斛他郡多取爲法遷給事中知壽州豪右多分占芍陂夏雨

盜嘗盜決若谷。擄冒占田者。逐之。每決。輒調顏岐諸豪使塞堤。盜決乃止。加集賢院學士。知江寧。還。勾當三班院。進龍圖閣直學士。知河南府。勅使送蔡過者。須索煩擾。若谷奏令鴻臚預約。所調移府逆爲營。辦改樞密直學士。知并州。民貧失婚姻者。出私錢以助贅壻。或亡賴委妻去爲立期不還。許更嫁。并多降人。喜盜竊爲籍。其累犯者三人爲保有犯。并坐。後者削去籍名。除工部侍郎。知開封寶元初。拜叅知政事。譏者忌。范仲淹諸人誣以朋黨。激上怒。若谷言風俗美惡。在上之人作而新之。今一舉目以朋黨恐正人無以自立。帝悟。爲下詔諭中外。尋以耳疾辭。任罷爲資政殿大學士。吏部侍郎。提舉會靈觀。加太子少傅。致仕。卒。年八十。贈太子太傅。諡康靖。若谷性資端重。在政府議論常近寬厚。治民多智慮。愷悌愛人。故去後多見思。少時與韓億

爲友及貴顯婚姻不絕 子淑字獻臣年十二真宗幸亳獻文
奇之命賦詩賜童子出身試秘書郎寇準薦授館閣校勘乾興
初遷大理評事爲真宗實錄檢討修成改光祿寺丞集賢校理
國史編修召試賜及第進太常丞直集賢院同判太常寺史館
修撰遷禮部員外郎上時政十議改知制誥勾當三班院爲翰
林學士避父叅政改侍讀端明二學士父罷擢吏部郎中典豫
王府章奏以右諫議大夫知許州歲饑取民所食五種上之帝
惻然爲蠲其賦權知開封轉中書舍人言者指其褻近吏人改
給事中知鄭州徙河陽遷禮部侍郎判流內銓在鄭嘗作周陵
詩國子博士陳求古以私隙訟其譏訕除龍圖閣學士出知應
天累表論辯不報請歸侍養父憂終喪罷奉朝請母憂服除仍
兼龍圖閣知河中府抑鬱不得志卒贈尚書右丞生平警慧過

人博習諸書詳練典故凡有沿革帝多諮訪制作誥命爲時所稱其他文多裁取古語務爲奇險不爲人許忌宋祁兄弟密言姓同國號郊非美識及祁草張貴妃制故事妃當冊命祁疑告身非是淑心知其誤不以告祁遂得罪去其傾險類此有所修國朝會要三朝訓鑒圖閣門儀制康定行軍賞罰格及繫訓三篇別集百餘卷 孫壽朋字延老慶曆初與弟復圭同試學士

院賜進士出身判吏部南曹使行諸陵奏言昭憲太后誕育二聖爲國文母獨以合葬安陵不及時祭請更其禮從之遷羣牧判官出知汝州盡推職田之入歸前守楊畋畋死又經理其家以饑歲營州廨勞民降知荆門軍歷開封推官戶部判官知鳳翔府滄州地震壞城郭帑庾壽朋督吏繕葺數月復舊括蕪田三萬頃縱民耕擇其壯者使習兵河方北涓故道隄塞壽朋度

必東潰諭居民徙避後三縣四鎮果墊司馬光出使薦其能加
直史館入直舍人院同修起居注進戶部鹽鐵副使暴得疾卒
爲人性敏擊斷過人然疎雋任俠縱游無度奉詔祀西太乙宮
飲酒食肉如常時識者非之 復圭字審言通判澶州澶爲北
使孔道驛傳煩苦有豪冒杜如晦後昧吏祈免復圭按籍役之
知滑州徙知相州相自太宗時聚夏人降者五指揮號廳子馬
相承百年無他役復圭至斥不如格者選能騎射者補之入爲
度支判官復知涇州奏言二稅之入三司移折已重運使又復
折之乞爲放免民立生祠以祀歷湖北兩浙淮南河東陝西成
都六轉運使浙民以給衙前役多破產悉爲罷遣令出錢召人
承募民使之瀕海人賴沙地生蛤而豪家受稅於官占爲已有
復圭奏蠲其稅分以予民熙寧初進直龍圖閣知慶州坐貪邊

功遣大將李信襲擊夏人御史謝景溫劾其擅興謫保靜軍節度副使歲餘知光化軍張商英言其非辜召判吏部流內銓知曹蔡滄州還爲鹽鐵副使以集賢殿修撰知荆南卒爲人臨事敏決稱健吏與人交不以利害避然輕率躁急無威重喜以言語侵人獨爲王安石所知故旣廢卽起

薛奎字宿藝絳州正平人父化光善數術嘗以平晉策于太宗不用時奎始生爲推策必至公輔登進士調隰州軍事推官僧舍有盜殺寺奴會民常聚博邏卒捕訊誣伏奎鞠之無驗後果得盜者徙儀州推官凡民所不便悉奏改之擢大理寺丞知莆田縣請蠲南閩時鹹魚蒲草稅錢還殿中丞知長水徙興州有錢監歲訓兵采鐵入不償費奎請聽民自采所輸輒倍遷太常博士向敏中薦擢殿中侍御史出爲陝西轉運使詔按延州蕃

落侵西夏地因聞郡籍趙德明嘗假道黑林平穆文示之遂伏
俄坐失舉免起通判陝州改戶吏二部員外郎淮南運副遷江
淮制置發運使疏漕河廢三堰以便餉運父喪奪哀擢三司戶
部副使與李士衡爭事改直昭文館知延州趙元昊每遣吏至
京請俸賜因市禁物爲姦利奎請留蜀道緣帛於關中轉致給
之遷戶吏二部郎中龍圖閣待制權知開封爲政嚴敏擊斷無
所貸真宗重之謂可任用使契丹還還右諫議大夫權御史中
丞仁宗立太后臨朝上疏論擇人求治崇節儉屏聲色凡十數
事命館伴契丹使蕭從順言南使至北得引見太后今北使乃
不得見奎對曰本朝家法雖羣臣亦未嘗見或以爲漏語收集
賢院學士知并州從秦州務爲儉約教民水耕謹商算覈隱田
歲中得芻粟積至百萬秦民與薶落數千人列其治狀聖書褒

諭加樞密直學士知益州臨事明決復多持重民婦子貧無以爲養訟其不孝奎爲出俸錢與之諭曰若復失養吾不貸汝遂母子如初嘗夜宴有成卒殺人密遣捕獲坐客無知者召爲龍圖閣學士權三司使天聖七年帝思先帝意拜叅知政事帝嘗語輔臣人臣事君鮮有克終者奎歷數唐開元天寶時事以對言保終之道匪獨在臣帝然之太后謁太廟欲被服袞冕奎力陳不可曰必御此若何爲拜及崩又欲以袞冕飲奎言服之豈可見先帝於地下帝悟乃止時二府大臣皆罷奎爲禮戶二部侍郎資政殿學士判尚書都省至給事中請逐內侍羅崇勳等從之旣而得喘疾帝手書禁方賜之少間入謁踰年卒贈兵部尚書諡簡肅爲人性剛不爲苟合遇事敢言先朝數宴大臣至有酩酊者奎諫今天下誠無事而宴樂不節非所以重朝廷也

真宗善其言及叅政事謀議正直無所避或志有不伸歸輒咤
歎不食家人笑曰何必如是奎曰吾仰慚古人俯愧後世爾尤
善知人所稱許范仲淹龐籍明鎬卒如其言無子以從子嗣
蔡齊字子思先洛陽人曾祖結爲萊州膠水令因家焉齊少孤
依外家劉氏登甲科第一儀狀俊偉舉止端重真宗顧寇準稱
爲得人詔金吾給七騶傳呼以寵之狀元給騶自齊始除將作
監丞通判充與維州至若作郎直集賢院仁宗擢右司諫修起
居注改禮部員外郎兼侍御史知雜事錢惟演守河陽請曲賜
鎮兵錢太后將許之齊爭言上新卽位不可偏聽外戚以示私
恩乃止俄轉起居舍人知制誥拜翰林學士加侍讀太后命齊
爲修景德寺文羅崇勳使人遽之許以叅政久之不上崇勳譏
之罷知河南魯宗道固爭不能得以親老改密州徙應天召爲

右諫議大夫兼御史中丞太后崩遣諸尊楊太妃爲皇太后同
裁制軍國事齊入白執政曰上春秋富習知天下情僞今始親
政事豈宜使女后相踵稱制乎遂罷改龍圖閣學士權三司使
有飛語荆王元儼爲天下兵馬都元帥捕得繫獄逮甚衆帝
怒令齊按問因奏小人無知不足深治且無以安荆王帝悟遂
釋之明道二年拜樞密副使交趾部八百餘衆疾其主欽宜州
寨議者謂不可納齊言蠻人去暴歸德卻之不祥請給荆湖閑
田使自營若縱去當不復還必聚爲盜不從蠻果爲亂太后姻
王蒙正子齊雄坐殺人除名未更赦復官齊入奏以恩廢法如
朝廷何帝命降一等齊執不可帝勉從之惟演附丁謂逐寇準
併削其樞密題名齊言準忠義乃社稷之臣豈可爲姦黨所誣
得不去上將立富人陳氏女爲后復極論之景祐二年拜禮部

侍郎叅知政事與王曾素善契丹祭天於幽州以兵屯境上齊於帝前畫三策言必無他俄坐呂夷簡與會不相能罷爲戶部侍郎出知潁州特請立州學從之卒年五十二贈兵部尚書諡文忠無子立從子延慶爲嗣爲人方重有風采性謙退不妄言有善未嘗自伐丁謂欲其附已終不肯往少與劉頴善頴罪廢上其書數十萬言得復官所薦龐籍楊偕劉隨段少連率爲名臣卒後頴人見其故吏朱案猶號泣思之延慶字仲遠登進士通判明州歷福建運判提點京東陝西刑獄神宗初以集賢校理爲開封推官辨衛士誣卒筒火入直反坐告者加直史館知河中府召入同修起居注直舍人院兼判流內銓拜天章閣待制出爲秦鳳路都轉運使以應辦熙河軍需功進龍圖閣直學士王韶進師河州羌斷其歸路延慶檄兵赴援及韶入朝令

攝帥事羌乘元夕張燈伏兵北關下遣其種二十九人僞降將
內應廷慶覘知之悉斬以徇伏者皆潰蕃官詐稱木征欲降邀
大將景思立來迎廷慶命毋輒出思立不從卒敗死俄知成都
兼兵馬都鈐轄以計度茂州築城區理失宜徙知渭州降天章
閣待制夏人入塞賣馬邊吏執之廷慶曰彼疑故來覘執之是
成其疑命約馬直遣之有疆吏往攘羊馬戮之敵境夏人悅服
嘗倣安南行軍法部分正兵弓箭手人馬團爲九將每將步騎
器械皆同分左右前後四部合百隊隊有駐戰有拓戰其蕃兵
人馬分爲別隊無得相雜以防其變各隨所近分隸老弱留處
城砦具爲書以上帝善其議召知開封府拜翰林學士以言罷
知滁州歷瀛洪二州復帥高陽定武元祐中入爲工吏二部侍
郎卒年六十二賜錢庀葬廷慶有學問平居簡默遇事能別白

是非所至有惠政齊後得遺腹子乃歸其宗凡家所有悉以付之無一毫自取萊人義焉

王巖字總之趙州臨城人七歲父喪哀毀弱冠館於王化基之門宋湜一見妻之以女及長狀貌奇偉登進士授婺州觀察推官代還真宗召見除著作佐郎知祁縣歷太常博士通判湖南提點梓州路刑獄權三司戶部判官使契丹還判都磨勘司遷度支員外郎兼侍御史知雜事上言方調兵塞決河而近郡災歉民力彫敝請罷土木之急者改主司戶部副使以曹利用同里註誤出知湖州徙蘇州還爲三司鹽鐵副使倖臣馬季良挾太后嫺家言京師賈人常以賤價居茶鹽交引請官置務收市之衆莫敢逆設獨以爲與民競利非國體不可俄擢天章閣待制判大理寺提舉在京諸司庫務權判吏部流內銓轉刑部

員外郎益利路饑遣使安撫以左司郎中樞密直學士知益州
遇戍卒夜焚營殺馬脇軍校爲亂駭潛兵環營下令曰不亂者
飲手出營無所問衆聞令皆出獨留亂者十餘戮之及旦居民
莫有知者蜀人德之其爲政有大體不爲苛察景祐四年拜右
諫議大夫同知樞密院事寶元初叅知政事二年遷工部侍郎
知樞密院事先於天聖中出使河北曹瑋告以君異日當柄用
願留意邊防吾嘗使人覘元昊狀貌異常他日必爲邊患腹殊
未以爲然後果反帝數問邊事腹不能對及西征失利議刺鄴
兵又久未決帝怒遂罷政出知河南未幾得暴疾卒贈戶部尚
書諡忠穆

李諮字仲詢唐趙國公暉之後暉貶死袁州遂爲新喻人幼有
至性父文提出其母諮日夜號泣食飲不入口父憐之還其母

人稱孝感及第除大理評事通判舒州召試中書遷太子中允直集賢院爲左正言歷三司開封度支判官淮南江東運副真宗幸亳以勞遷禮部員外郎知制誥所擬制詞寇準數有改易詔不樂請外出知荆南召爲翰林學士仁宗初立權三司使拜右諫議大夫奏天下賦調有定今二十年西北寢兵而邊餽如故兵雖未可減其末作浮費非本務者宜一切裁損詔與中丞劉筠等同議以景德較天禧計所減得十之三太后因陝西緣邊數奏軍食不給憂三司度支錢不足支命與呂夷簡魯宗道張士遜經度其事詔以舊法商人入粟邊郡算茶與犀象緡錢爲虛實三估出錢十四文得三司錢百文請變法以實錢入粟實錢售茶三者不得相爲輕重旣行商人失利怨謗蠭起以疾累請郡改樞密直學士知洪州數月而御史臺鞠吏王舉妄稱

增課以覲恩賞詔坐不察奪職久之進給事中知杭州復直學士知永興章杖衣冠子弟侍廕無賴者境內肅然還勾當三班院禁中火倉卒營造應辦舉集進禮部侍郎明道二年拜樞密副使景祐二年知樞密院事父喪起復改戶部侍郎知諫院時茶法寢壞詔蔡齊等更議於是復用詔所變法語具食貨志卒贈右僕射諡憲成詒性明辨周知世務其處煩碎常若閑暇吏不敢欺在樞府專移革濫賞抑僥倖人謂稱職

盛度字公量應天府人曾祖璫仕錢氏爲餘杭令徙家焉父豫從儼入朝終度支郎中度登進士補濟陰尉轉封丘簿開封府倉曹叅軍光祿寺丞御史臺推勘官改秘書郎試學士院得直史館遷三司戶部判官屯田員外郎契丹寇邊度從幸大名使陝西圖覽疆域叅質漢唐故地繪爲河西隴右西域三圖以

上言唐置節度使以宰相兼領用非其人故有河山之險而不能固有甲兵之利而不能禦今復繪山川道路壁壘區聚願備上覽真宗稱其博學改開封判官坐決獄失實降監洪州稅請復賢良方正等六科語在真宗記旣而夏竦建議皆自度始起知建昌軍三司鹽鐵判官以起居舍人知制誥判會靈觀至翰林學士史館修撰景靈官副使以交通周懷政出知光州乾興初再謫和州團練副使丁謂貶起爲祠部兵部郎中請追封其母郡君自是學士未至諫議者皆得封遷太常少卿知筠州更虔滁蘇三州還知審刑院以右諫議大夫知揚州加集賢院學士復官翰林遷給事中詔與中丞王隨議通解商聽入錢算鹽語在食貨志進承旨以禮部侍郎兼端明侍讀二學士召問邊計條十事以上景祐二年拜叅知政事同叅蔡齊與王曾善宋

綬與呂夷簡善度獨不得志及二相辭位仁宗問以何故
退度對二人腹心之事臣不得知陛下但詢以孰可代者則其
情可察矣上果問會薦齊夷簡薦綬於是四人俱罷度獨留遷
知樞密院事章得象既相以度嘗位其上卽拜武寧軍節度使
寶元二年坐令馮士元強取其鄰所質官舍罷爲尚書右丞復
知揚州加資政殿學士知應天度體肥暴威風眩以太子少傅
致仕卒贈太子太保諡文肅平生好學家列圖書每歸未嘗釋
手敏於爲文汎濫不精嘗奉詔同編續通典文苑英華注經御
集真宗祀汾陰仁宗在藩卽詔掌起居牋奏及留司章奏有恩
各銀臺中書樞密四集又有中書翰林二制集然性猜險雖平
居僚友言語不敢易所至下貧無賴多縱捨稍有貲者一切繩
之以法人故少之子申甫終兵部郎中集賢校理福建轉運使

頗以修潔稱從兄京有吏能以工部侍郎致仕卒

程琳字天球博野人舉服勤辭學科補泰寧軍節度推官改著作佐郎知壽陽縣監左藏庫召試直集賢院改太常博士權三司戶部判官館伴契丹使者蕭蘊杜防出圖示琳請升坐殿上琳以真宗所定不敢擅易又言先皇帝嘗通使承天太后今何獨無琳曰南北兄弟也先皇帝視承天猶從母故無嫌今皇太后乃嫂也禮不通問蘊等語塞豫修真宗實錄獨闕祥符以來起居注琳追述上之俄提舉在京諸司庫務知制誥判吏部流內銓權發遣三司使盡發太倉陳粟以貸饑民收其新入兩得全便議更鑄錢度支許申請以銅鐵雜鑄琳謂猝不可行乞令申試卒不就俄以右諫議大夫權御史中丞宰相張知白器之當除命喜曰不辱吾筆歲饑請罷土木營造獨被災租賦改樞

密直學士知益州上元張燈戒曰有火隨救毋輒白已而果然
終宴人無知者或告振武軍變琳謂軍中動靜纖悉必知苟有
謀不待告也遷給事中權知開封王齊雄捶卒死托爲病亡有
司驗得死狀后曰奴也琳謂奴無自尊理主者當同坐太后默
然遂論如法外戚吳氏女離夫挈歸納於宮中夫來訴琳請於
帝曰臣恐有竊議陛下奪人妻女者帝亟命出之遷工部侍郎
翰林侍讀學士兼龍圖閣學士再知開封改三司使出納尤謹
禁中所取輒奏罷之內侍言其專琳謝曰凡財賦皆朝廷有臣
但爲陛下惜財於已何有帝然之或請併天下農田稅物爲一
以便勾校琳謂後必有興利之臣易於增舊是重民困也卒不
許再轉吏部侍郎進左丞景祐四年拜叅知政事元昊反大臣
請誅其使琳獨言使者往來殺之不宜後使者益驕橫琳復請

誅之曰始不殺者以其無罪今誅乃國法也朝議重賄喃廝囉使討賊得地卽與之琳言如此是復生一元吳不若用間使二敵勢不得合乃中國之利寶元二年坐買故樞副張遜第降光祿卿知潁州復起爲戶部侍郎資政殿學士知天雄軍會建爲北京內侍皇甫繼明主管宮室欲侈大以要賞琳謂方事邊陲又興土木數有論奏帝遣魚周詢按視遂罷繼明命琳獨主之遷工部尚書加大學士河北安撫使改武昌軍節度使知永興軍兼陝西安撫使改宣徽北院使判延州適元吳死諒祚方幼三大將分治其國議者欲因此時啖以節度名口俾各部分以弱其勢琳謂幸人之喪不如因而撫之又度夏人方圍慶陽彼貪冊命必可紓難乃移書具禮報之果喜卽迎冊使解慶陽圍琳嘗獲敵人不殺戒遣之夏人亦相告毋捕漢民久之詐爲反

叛者五百戶驅牛車扣邊請降琳拒不受已而賊果引騎三萬
臨境以捕降爲辭琳戒諸將勿動賊疑有備引去拜同中書門
下平章事判大名特重不擾若守十年度要害繕壁壘增守備
人愛之爲立生祠改武勝鎮安軍卒贈中書令諡文簡爲人敏
厲深嚴長於政事辨議一出不肯下人然性吝嗇厚自奉養章
獻太后時嘗上武后臨朝圖人以此薄之